

21 JULIE 2019



3iG

'n saam-glo dissipelskap gesprek



saam bid

Ons vind nie tyd vir gebed nie, ons maak dit.

B.I.D. staan vir:

B: Bely teenoor God Wie Hy vir jou is én bely ook jou gesukkel vir Hom.

I: Intree vir ander (bv. Jou 3iG-lede, jou familie, wêreld, ens.).

D: Dankie-sê, maak daagliks jou dankie-lys en dank God daarvoor.

LEWENS-LEUSE: Bely elke oggend en aand 1 Kor. 9:23 se waarheid:

"Dit alles doen ek ter wille van die evangelie, sodat ek aan die vrug daarvan deel kan hê."

saam groei

Ons lees nie die Bybel nie, ons laat die Bybel ons lees.

Amos was nie opgelei om 'n boodskapper van die Here te wees nie. Hy het met skape en vyebome geboer, en die armer mense het vye geëet. Die landstreek waaruit hy gekom het, was ook een van die minder vrugbare dele van die land. Wanneer hy sy boodskap bring, gebruik Amos beelde uit die wêreld van die landbou. Hy praat van leeus wat die skape vang. Hy wys op sprinkane wat die groen gras opvreet. Hy onthou hoe 'n wa wat te swaar gelaai is in die sand vasval. In sy gesig sien hy 'n mandjie somervrugte wat ryp is om geëet te word. Wanneer Amos egter in Samaria aankom sien hy iets veel ergers as 'n trop leeus wat vee vang. Hy sien hoe ryk mense die wet en die handel gebruik om arm mense uit te buit. Hy sien hoe onregverdig hulle is om iemand vir die prys van 'n paar sandale te verkoop omdat hy nie kan betaal wat hy skuld nie. Hulle maak boonop of hulle godsdienstig is en spog oor die baie offers wat hulle vir God bring. A! Lees nou van Amos se volgende gesig in Amos 8:1-12.

saam gesels

Jesus verwag van ons minder nastaar (admiration) en meer naleef (imitation).

1. Deel met mekaar julle eerste gewaarwordinge by die lees van Amos 8:1-12. Wat in hierdie gedeelte het julle geraak? Waarom staan dit vir jou uit?
2. Die vierde visioen van Amos waarin hy 'n mandjie somervrugte sien, wek assosiasies op van die mandjie vrugte wat die Israëliete elke jaar met oestyd

tempel toe geneem het uit dankbaarheid en erkenning van God se seën met die oes en die goeie land, wat die Here hulle God aan hulle geskenk het (lees Deut. 26:1-10 hieroor). Maar anders as die feesmandjie van Deut. 26, gee die stem van die Here in hierdie visioen besliste aanduidings dat hierdie mandjie met vrugte 'n ander betekenis het. Gee met die aanduidings uit die teks julle eie beskrywing van die betekenis van hierdie mandjie vrugte wat Amos gesien het?

3. "Bly liewer still!", kom die bevel van die Here in vers 3. Verderaan lees ons dat ook God se stem stilgeword het: dat God Hom aan hulle ontrek het, alhoewel hulle naarstigelik na God se Woord en wil nou al-slingerend-soek. Dink saam met mekaar na oor die betekenis van hierdie vreemde bevel en ook die God-stille. Probeer julle inleef in so 'n situasie. Hoe verskriklik moet dit nie wees nie?
4. "In Amos se tyd het dit alles begin by mense wat vreeslik getrou kerk toe gegaan het, maar van godsdien in naastedien niks begryp het nie." Bespreek hierdie stelling aan die hand van verse 4-6 en let veral op die wyse waarop hulle armes in handelstransaksies uitgebuit het. Hoe kan ons Jesus-navolgers ook in besigheidstransaksies wees? Die Here sê dat Hy 'n eed by Homself afgelê het en dat Hy nooit sal veraeet wat hulle dedoen het nie....

saam stap

Eers vorm ons gewoontes en dan vorm die gewoontes ons.

Geloofsgewoonte: **Om reg en geregtigheid te beoefen.** Met hierdie geloofsgewoonte leef ons die liefde van Jesus só konkreet uit dat ons daarop uit is om ander se belange bó ons eie te stel, ander se voordeel, hulle veiligheid en menswaardigheid op so 'n wyse na te jaag dat hulle te alle tye billik en regverdig behandel word, al vra dit van ons om onbillike behandeling en onreg van die verlede reg te stel en selfs daarvoor te ly. Lees hieroor in Amos 5:14-15, 24; Heb. 13:3; Jak. 1:27-2:1; 2:8-9.

Doen-dinge:

1. Gaan op 'n kort-termyn uitreikaksie in jou onmiddellike omgewing en raak bewus van die verskillende gesigte wat die nood daar reg rondom jou het.
2. Raak betrokke by organisasies wat hulle beywer om byvoorbeeld kos en kler, behuising en nagskoolings vir haweloses te voorsien of wat werk soek vir werkloses. Stel jousef as vrywilliger by so 'n organisasie beskikbaar.
3. Begin doelbewus te bid vir vrede, geregtigheid en billike behandeling van alle mense, asook die skep van gelyke geleenthede aan almal om as mens te kan leef.

Dink-dinge:

1. Dink jy ooit na oor onreg en onbillikheid? Pla dit jou? Waarom? Waarom nie?
2. Oorweeg dit om jousef en jou tyd te gee vir dienswerk onder armes, noodlydendes en agtergeblewenes.
3. Dink na oor 'n tyd of geleentheid toe jy onregverdig behandel is.

3 STAPPE

'n 3iG-groep is 'n saam-glo groep wat deur bid, groei en dien Jesus dieper volg. Drie mense wat kies om saam te bid, saam te luister en saam ons geloof te leef.

2 ANDER

Dit is slegs ek en 2 vriende wat 'n spontane groep vorm. Dit kan egter ook uit meer as drie mense wees: ons familie of vriende of kollegas of mense in die gemeente.

1 GESREK

Ons maak weekliks met mekaar kontak (deur 'n koffie-afspraak of telefonies) rondom die gefokusde saam-gesels van die week. Die leier – wat elke week wissel – sorg dat ons mekaar daardie week sien.